

he mira huri paraoa ki Waikaka, rokohanga e te whawhai hauhau kaore i oti, ko te potatutatutanga tena o nga mea katoa.

Ko te nuinga o te witi kaore i hurihia hei paraoa, engari i haria ki Akarana hei hoko ki te pakeha, ko nga kaupuke i taria ai no nga maori ano, ko Mereana, ko Purehe, ko Ihi Keepa, ko Kingi Paerata ko te Mawhai.

Kotahi te kaupuke kaore i oti, e hanga tonu ana, ka tanuku te whenua, ka tapuketia te kaupuke ra me nga kai-hanga. Ko era atu kaupuke ia, he mea hoko mai i te pakeha he witi te utu. Ko Mereana no Mokena Kohere, no te rerenga whakamutunga ki Akaranga, he Ngapuhi te kapene; i o Ngati-Porou tangata i te taone ka kahakina te kaupuke nei e te kapene ratou ko ona hoa, ngaro atu.

Ko Purehe no Huripuku; ko Te Mawhai no te Whanau-a-rua ki Tokomaru. Ko Kingi Paerata i totohu ki waho o Tuparoa. I whakahoroa tonutia te witi ki roto i te riu, no te putanga o te uruhanga tonga, totohu tonu iho i te taumaha o te witi.

Ko Te Kingi Paerata te kaupuke o Te Ra-ka-hurumai i peka nei ki Harataunga (Hauraki). Ko te take tena o te noho o Ngati-Porou i noho ai ki tera wahi, ara, Kei runga i te tuku a Paoro Te Putu kia Te-Ra-ka-hurumai.

Na Hori Mahue te korero, i te tuunga o te kaupuke o Mokena Kohere ki Waihke, ka tukuna tena moutere kia Mokena, engari no muri mai ka whakahokia e Mokena ki te iwi kaainga.

I te hotoke, i te mea kaore he mahi ma nga kaupuke, ka tu i roto o Awatere, herea ai ki te pohutukawa; e tu mai na ano taua pohutukawa ianaiane; kei te taha ki Whakaea. Ko Huripuku te kaitiaki o nga kaupuke ina tau ki Awatere; he hohonu hoki a Awatere i aua ra.

I konci a Ihi Keepa e tau ana, ka riro nei i te waipuke, ka paea ki te waha o Rerekohu.

He maori tonu ki te whakaterere i o ratou kaupuke, ehara i te pakeha.

Ko te Mokena tonu te kapene o tona, he koroua toa hoki ki te rere moana, ki te whakaterere poti hoki i runga i nga ngaru.

Tera ano etahi take, haunga ano ia te takoto o te whenua o Ngati-Porou, i mau tonu ai nga whenua o tenei iwi. Ahakoa te matara o te whenua i nga putahi o te pakeha, e riro i te kawanatanga i runga i nga raupatu. I te taenga o nga karere a te hauhau i te tau 1865 ara a Patara o Te Wiwini i huri te nuinga o Ngati-Porou, a mura ana te ahi o te pakanga ki roto o Waiapu; ka hinga te tangata. Ko Mokena Kohere ratou ko ona hoa torutoru nei i whakapaea e te hauhau ki